

**Meeqqat atuarfianni fagini tamani akunnernut ilinniartitsiviusussanut minnerpaaffiliinissaq anguniarlugu inatsimmut atuuttumut allannguutissatut siunnersuummik saqqummiussinissamut Naalakkersuisut peqquneqarnissaannut inatsisartut aalajangiiffigisassaattut siunnersuut. Inatsisip allanngortinneqarneranittaaq akullerni atuartuniit tulluttut danskisullu akunnerit ilinniartitsiviusut amerlaqatigiilernissaat qulakkeerneqassaaq. Allannguut aggustimi 2020-mi atuutilissaaq.**

(Inatsisartunut ilaasortaq Mimi Karlsen, Inuit Ataqtigiit)

## **pillugu**

**Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliap**

**siunnersuutip aappassaaneerpeqarneranut**

## **ISUMALIUTISSIISSUTAA**

Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliap suliarinninnermini ilaasortarai:

Inatsisartunut ilaasortaq Mimi Karlsen, Inuit Ataqtigiit, Siulittaasoq  
Inatsisartunut ilaasortaq Vivian Motzfeldt, Siumut, Siulittaasup tullia  
Inatsisartunut ilaasortaq Laura Táunâjik, Siumut  
Inatsisartunut ilaasortaq Peter Olsen, Inuit Ataqtigiit  
Inatsisartunut ilaasortaq Henrik Fleischer, Parti Naleraq

Ulloq 9. maj 2017-imi UPA 2017-ip nalaani siullermeerinninnerup kingorna ataatsimiititaliap siunnersuut misissorpaa.

### **1. Siunnersuutip imarisaa siunertaalu**

Nunatsinni atuarfinni atuartut atuartitaaneranni tiiminik inatsisitigut aalajangersarneqarsimasukkut minnerpaaffissaliinissamut siunnersuutikkut piumasaqaateqarnissaq siunnersuuteqartup kissaatigaa. Tamatuma saniatigut atuartuni akullerniit aallartittumik tulluttut danskisullu atuartitsinermini akunnerit amerlaqatigiilernissaat siunnersuuteqartumit kissaatigineqarpoq. Inatsisitigut allannguneq kissaatigineqartoq august 2020-mi atuutilissasoq piumasarineqarpoq.

### **2. Siunnersuutip inatsisartuni siullermeerneqarnera**

Siunnersuut siullermeerneqarnermini assigiinngitsumik tapersorneqarpoq, taamaattorli atuarfimmi akunnerit atuartitsiviusut ikinnerpaaffilerneqarnissaannik piumasaqarneq

amerlanerussuteqartunit tapersorneqarpoq. Tuluttut danskisullu atuartitsinermi tiimit amerlaqatigiissinneqarnissaat pillugu annertuumik oqallittoqarpoq, tassani politikikkut oqariartuutit, oqaluttuarisaanikkut attuumassuteqarnek ilisimasalinnillu peqataatitsinissaq pillugit itisuumik oqallittoqarluni.

Maannakkut atuarfik pillugu inatsisini anguniagarineqartuni siunertalimmik tunngaviumillu aqutsinermik anguniakkat pillugit aalajangersakkanut siunnersuutip akerliunera tunngavilersuutigalugu siunnersuut Naalackersuisunit tapersorneqanngilaq. Tamatuma saniatigut Naalackersuisut kissaateqarnerat malillugu atuarfimmi ilinniartitsisut tassaasariaqartut tiiminik agguataarinissamut aalajangiisartuussussat Naalackersuisunit oqaatigineqarluni. Tamatuma saniatigut atuarfimmi oqaatsinik piginnaasaqalersarnek pillugu immikkut suleqatigiissitanik pilersitsisoqarsimanagera tamatumani tuluttut aamma danskisut atuartitsinermi tiimit atukkat ilanngullugit misissorneqartussaaneri Naalackersuisunit erseqqissaatigineqarpoq. Ilanngullugulu Naalackersuisut erseqqissaatigaat tiimit amerlaqatigiinneri ima isumaqartariaqanngitsoq atuartitsissutit taakku assigiimmik ingerlanneqarsinnaallutik.

### **3. Siunnersuutip ataatsimiititaliamit suliarineqarnera**

Tamatta atuarfiutitta malittarisassiunneqarnera eqqartorneqartillugu ersarilluinnarpoq, nukarlernut kinguaariillu tulliinut atugassarititaasut pitsaanerpaaffissaminiitinnissaat qitiutittariaqaripput. Meeqqat atuarfimmit pissarsiarisinnaasaannik soqutiginninneq inatsisinit siorngatigut aalajangersarneqarsimasunit kiisalu taamanikkut pissutsinit pingaernerutinneqartariaqarpoq. Nunami ingerlaavartumik ineriartortumi sunnerneqartumilu atuarfik ingerlasinnaasariaqarmat immitsinnut aperiuartariaqarpugut tamatta atuarfipput pitsaanerpaanik ingerlanersoq, meeqqagut siunissamut piareersarnerai, kiisalu inuiaqatigiinnut atuarfiup peqataaffigisaanut naleqquttumik atuarfik ingerlanersoq. Tamanna ingerlaavartumik suliarineqartariaqarpoq. Tamatumali malitsigisariaqanngilaa inatsisip naleqqussarneqartuarnissaa aamma allanngortittuarnissaa, taamaattorli aamma inuiaqatigiinni piviusut pinngitsaaliissummik inatsimmut naleqqusarneqartariaqanngillat aammalu taamaattumik inatsit "illernartuunani". Inuiaqatigiit, nukissaqarneq, piffissaq aamma meeqqat allanngorsinnaasut politikikkut ammaffigineqartariaqarput. Inatsimmi pissusissamisut ingerlanngitsoqarnera tikkuarneqarpat tamatuma inatsimmik allannguinissamik malitseqarsinnaanera nalilersoqqissaartariaqarpoq.

Akunnernut ilinniartitsiviusussanut minnerpaaffiliinissaq kiisalu atuarfimmi akullerni atuartuni tuluttut aamma danskisut atuartinneqartarnerisa amerlaqatigiissinneqarnissaat pillugit nalilersuilluni siunnersuummi kissaatigineqartut aallaavigalugit ataatsimiititaliap sularivaa.

#### **3.1 Aalajangersakkat atuuttut**

Soorlu Naalackersuisut erseqqissaatigigaat atuarfimmik 2002-mi aaqqissuusseqqinnermi akunnerit atuartitsiviusussat agguataarnissaannut najoqqutassatut ilitsersuut atuartoqassuseq

aallaavigalugu akunnernik atuartsiviusussanik ikilisaaffiusinnaasoq atorunnaarsinneqarpoq. Tamatuma kingorna atuarfik pillugu inatsisartut inatsisaat nr. 15. 3. dec. 2012-meersup akuersissutigineqarneratigut atuarfik pillugu peqqussut<sup>1</sup> atorunnaarsinneqarpoq. Atuarfik pillugu peqqussutaasimasooq kiisalu atuarfik pillugu inatsit maannakkut atuuttoq tunngavigalugit nalunaarutinik arlalissuarnik aalajangersaasoqarsimavoq, trinini faginilu agguataarlugit ilinniartitsinermit pilersaarutinik arlalinnik aalajangersaasoqarneranik nassataqartunik. Tamatumani tunngaviumik eqqarsaatigineqartoq tassaavoq imarisanik aallussinissaq aamma perorsaaniikkut pitsaassuseq, ilinniartitsinerup annertussusaa pinnagu, tamanna naak atuartsinermit tiimit ikinnerpaaffissaat inatsisitigut aalajangersarneqareersimagaluartut.

Atuarfimmi tiimit atuartsiviusussat tamakkiisut atuartut ataasiakkaat ukiumut agguaqatigiissillugu atuartinneqarfissaat tunngavigalugit ullumikkut nalimmassarneqartarput. Inatsisartut atuarfik pillugu inatsisaanni nr. 15. 3. dec. 2012-meersuni § 7. Imm. 1-4-mi takuneqarsinnaavoq:

*§ 7. Piffissaq atuartut atuartinneqarfissaat tiimit atuartsiffiusut 60 minutsikkaartut tunngavigalugit ukiumoortumik naatsorsorneqartassaaq. Imm. 2. Nukarlerni ukiuni atuartsiffiusuni 3-ni tamani atuartut ukiumut minnerpaamik nalunaaquttap akunnerini 700-ni atuartinneqartassapput. Akullerni atuartut ukiut atuartsiffiusut 4-anni minnerpaamik nalunaaquttap akunnerini 890-ini, ukiut atuartsiffiusut 5-ini minnerpaamik nalunaaquttap akunnerini 920-ni, ukiullu atuartsiffiusut 6-ini 7-inilu minnerpaamik nalunaaquttap akunnerini 970-ini atuartinneqartassapput. Angajullerni atuartut pinngitsoorani atuartsissutini, ukiut atuartsiffiusut 8-anni, minnerpaamik nalunaaquttap akunnerini 880-ini, ukiut atuartsiffiusut 9-anni minnerpaamik nalunaaquttap akunnerini 910-ni kiisalu ukiut atuartsiffiusut 10-anni minnerpaamik nalunaaquttap akunnerini 920-ni atuartinneqartassapput. Imm. 3. Imm. 2-mi aalajangersakkat sanioqqunneqarsinnaapput, atuartut ingerlaqatigiinni (holdimi) amerlassusaasa pisariaqartippassuk. Imm. 4. Sapinngisaq naapertorlugu piffissap atuartut atuartinneqartarfissaata, ukiup atuarfusup sapaatip akunneranut sapaatip akunneratalu ulluinut oqimaaqatigiissumik agguataarneqartarnissaa anguniarneqassaaq, tak. § 8, imm. 1-3. 1-3.*

Taaneqartumi § 8, imm. 1-3-mi ukiup atuartsiviusup siviussusaa agguataagaaneralu pillugit imatut allassimasooqarpoq:

*§ 8. Ukioq atuarfusooq 1. august aallartittassaaq, ullullu atuarfusussat 200-niit 240-nut amerlassuseqassallutik, atuartsinerlu sapaatip akunnerata ulluini*

<sup>1</sup> Inatsisartut atuarfik pillugu peqqussutaat nr. 8 21. maj 2002-meersooq kingusinnerusukkat allanngortinneqartoq

*siullerni 5-ni imaluunniit ulluini siullerni 6-ini pisassaaq.*

Imm. 2. *Immikkut aaqqissukkanik pikkorissartitsilluni ingerlatsinermi, atuartitsissutit akimorlugit ingerlatsinermi, sammisanillu aalajangersimasunik qulequtsiilluni, piareersariikkanik anguniagaqarluni, periutsillu taakku assigisaannik atuartitsissutinik ingerlatsinermi, atuarfiit sapaatip akunneranut ulluni 5-ini atuartitsiffiusartut sapaatip akunnerisa ulluisa 6-at atuartitsivigisinnaavaat taamaattoqassappat atuarfik ukiup atuarfiusup aallartinnissaa sioqqullugu tamanna pillugu pilersaarusioreersimassaaq.*

Imm. 3. *Atuartitsineq sivikinnerpaamik sapaatip akunnerini 36-ni sivisunerpaamillu sapaatip akunnerini 40-ni ingerlanneqartassaaq.*

### **3.2 Atuartitsinerit minnerpaaffianiitsinneqarnissaanik inatsisitigut piumasaqaatit**

Atuartitsissutit siunertaannut, trinit siunertaannut, atuartitsinermullu siunertanut kiisalu aqutsinermut sakkussanut atuarfik pillugu inatsimmut maannakkut atuuttumut siunnersuut manna naleqqutinngitsoq naalakkersuisut akissuteqaamminni tunngavilersuutigaat. Kisiannili Naalakkersuisut nangaassuteqarnerat ataatsimiititaliamit isumaqatigineqanngilaq. Taamaallilugu tiimit atuartitsiviusut meeqqat atuarfiat pillugu inatsimmi atuuttumi § 7, imm. 2-mi taaneqartut tamarmik agguataarneqarnissaat pillugu piumasaqaatit siunnersuut manna ataatsimiititaliamit isigineqanngilaq. Taamaallaat pineqarput atuarfimi fagini tamani tiimit minnerpaaffissaminiitinneqarnissaat taamaallunilu atuarfik pillugu inatsimmi § 7-mi taaneqartut tiimit tamarmik agguataarneqarnissaat pillugu piumasaqaataanngilaq. Tiimit atuartitsiviusut sinneruttut Kommuninut namminneq agguataarneqarnissaannut minnerpaamik neqeroortigineqarnissaat attatiinnarneqassaaq, (tamatumani saniatigut kommunit ataasiakkaat sukulluunniit saniatigut tiiminik atuartitsiviusunik neqeroorteqarsinnaapput). Atuarfik pillugu naggataarutaasumik Namminersornerullutik Oqartussat nalunaarutaanni nr. 3-mi 9. Januar 2009-meersuni § 7-10 tunngavigalugit atuartitsissutit tamarmik, inuttut ineriartorneq kisimi pinnani, pisussaaffiupput imaluunniit misilitsissutaasussaallutik.

Tiimit atuartitsiviusut amerlassusaat inatsimmi atuuttumi piumasaqaatigineqartumit annerusumik nalilersorneqarnissaat siunnersuummi matumani kissaatigineqartoq ataatsimiititaliamit akuerineqarpoq. Tamatumunnga atatillugu Naalakkersuisunit ima oqaaseqartoqarpoq:

*”Tamanna aamma imatut oqaatsigineqarsinnaavoq, aalajangiisuunerusartooq akunnerit atuartitsissutigineqartut imarisamik kut qanoq pitsaassuseqartuunersut, tamatumani aalajangiisuunerpaasartooq atuartitsinerup pitsaassutsimigut qanoq qaffasitsigisimanersoq.”*

(Naalakkersuisut akissuteqaataat – ataatsimiititaliap erseqqissaanera.)

Naalakkersuisut siunnersuuteqartoq isumaqatigalugu minnerpaatut atuartitsinerup qulakkeerneqarnissaa piumagaat ataatsimiititaliamit paasineqarpoq. Taamaattoqarpat

ataatsimiititaliaq nunatsinni ilinniartitsisunik taakkualu ilinniartitsinermut piginnaasaannik upperinnerat annerulaarpoq. Atuartut naatsorsuutiginninnerannut pisariaqartitaanullu siunnersuut akornusiissussatut ataatsimiititaliamit taamak annertutigisumik erngumagineqanngilaq. Assersuutigalugu atuartut inatsisit naapertorlugit 4. Klassimiit inuiaqatigiilerinermik atuartinneqartussaattillugit ilimagineqareerpoq klassep piginnaasaqassutsikkut agguataagaanera, atuartut ataasikkaat piginnaasaat/pisariaqartitaat imaluunniit ilinniartitsisut piginnaasaat/ilinniagaat apeequtaatinnagit naatsorsuutigineqarpoq kommuni inuiaqatigiilerinermut tiiminik minnerpaaffissalerlugu atuartitsinermik neqerooruteqassasoq – pingaartumik kingullermut tunngatillugu ataatsimiititaliamit tunngaviatigut naatsorsuutigineqartariaqarpoq kommuninit sapinngisaq naapertorlugu inatsisini aalajangersarneqarsimasut tunngavigalugit pitsaassuseq qulakkeerniarumaaraat. Atuartut ataasiakkaat piginnaasaannik/pisariaqartitaannik aamma atuartitsinermi suliarisimasaannik erorsaanikkut suliaqartut atuarfimmilu siuttut nalilersuinerat qaqugukkulluunniit atuartitsinermi sulianut aallaaviusariaqassaaq. Tassa, assersuutigalugu matematikkimik atuartitsineq, atuartoq tiimit marluk imaluunniit qulit atuartinneqarnera apeequtaanani atuartut ataasiakkaat aallaavigalugit ingerlanneqartariaqarpoq. Tamanna fagini tamani atuuttariaqarpoq.

Naalakkersuisut akissuteqaamminni ersarissaapput:

*”Taamaattumik Naalakkersuisut isumaqarput kommunalbestyrelsit suli taakkuusariaqartut, sinerissami atuarfinni kommuninilu **perorsaanermik suliaqartunit innersuussutit tunngavigalugit** – meeqqanik qanimut atassuteqarnikkut attaveqateqarnikkullu – ilikkariatortitsiniarluni sammisaqarnernik pilersaarusiortullu aaqqissuisartussat.”*

(ataatsimiititaliap ersarissaanera)

Fagini tamani atuartitsinermi tiimit minnerpaaffissalernerneqarnissaanut piunasaqarneq kommunit atuarfimmut akisussaaffiunik sunniutaanillu millisaaniarnerunani atuartut ataasiakkaat piginnaasaqalernissannut qulakkeerinninnissamik isikkoqarnerusoq ataatsimiititaliamit takuneqarsinnaasorinarpoq.

Ulloq 5. maj 2017 ilinniartitsisut kattuffiata IMAK-ip ilisimatitsissutaasumik ataatsimiinnerannut ataatsimiititaliaq peqataavoq. Ataatsimiinnermi tassani IMAK-ip ilaatigut pissutsinut aamma tunngavissanut pilersaarutimik ilaanik saqqummiussaqqarpoq. Tassani ersarissumik allassimavoq tiiminik minnerpaaffissaliinissamik ilinniartitsisut namminneq kissaateqartut<sup>2</sup>. Atuartut pisariaqartitaat pinnagit, fagini tiiminik atugassiinermi qassinik aningaasartuuteqarnissaanik atuarfiit isumaliutersuuteqarnissannut ullumikkut periarfissaqarneranik tamanna ilaatigut tunngaveqqarpoq. Atuartut fagit suut misilitsiffigisussaagaat tamanut saqqummiunneqaraangat atuartoq fagimi pineqartumi ulloq

<sup>2</sup>[http://www.imak.gl/fileadmin/foreningen/Princip\\_og\\_indsats/princip\\_indsats2015\\_gr.pdf](http://www.imak.gl/fileadmin/foreningen/Princip_og_indsats/princip_indsats2015_gr.pdf), qupperneq 2

manna tikillugu tiimit arlaqanngitsut taamaallaat atuartinneqartarmat, ukiumi atuarfiusumi piffissaq kingulleq tiimit pineqartut atuartitsissutigineqarnerisa qaffanneqartarnerat pisinnaasarpoq, tamanna aningaasatigut inissisimanermik pissuteqartumik. Taamaalilluni meeqqat ataasiakkaat atuarnerminni tiimini aalajannersimasuni atuartinneqarnissaasa qulakkeerneqarnissaanut naleqqiullugu aningaasaqarnerup salliutinneqaratarsinnaanera minnerpaaffissamiitinnissaanut siunnersuut una periarfissiisungavoq. Nunaqarfinni atuartut illoqarfinni atuartut assigalugit fagini ataasiakkaani tiiminik qulakkeerinnissunneqarnissaat taamatut kissaateqarnermi ilanngullugu eqqarsaatigineqarpoq.

Sulisut perorsaanermik ilinniarsimasut piginnaasatillu naapertorlugit nalilersuinerat tunngavigalugu atuartut tiimissaannik aalajangersaasarnerup ingerlanneqartariaqarnera Naalakkersuisut oqaatigimmassuk nuannersutut nersortarialittullu ataatsimiititaliamit isigineqarpoq. IMAK-ip pissutsinut aamma tunngavissanut pilersaarutaa kaammattuutitut nalilersuinertullu taamaattut taaneqartariaqarpoq, tamanna ilinniartitsisut aaqqissuisinnaanerat naapertorlugu – tamanna nuna tamakkerlugu.

Minnerpaaffissamik piunasaqarnermi atuarfimmi tiimit tamarmik pineqarmata siunnersuummik maannakkutut ilusilimmik akuersinerup nassatarissavaa tiiminik misilitsissutaasussanik atuartitsineq kisimi pinnani aammali inuttut ineriartornermik atuartitsinerup eqqorneqartussaanera. Ilinniartitaanermi ingerlaqqiffiusumik ilinniartinnut isernissamat fagit misilitsissutaasumik atugassat qitiutillugit faginut aalajangersimasunut siunnersuut sammisimasinnaagaluarpoq. Taamaattorli siunnersuut maannakkutut isikkoqartilluni inatsisartunit amerlanerussuteqartunit tapersorsorneqartoq ataatsimiititaliamit maluginiarneqarpoq.

Siullermeerinninnermi fagit tamarmik minnerpaaffilerneqarnissaannik aalajangiinissaq paasisimasaqannginnermik tunngaveqarluni aalajangiinissatut Naalakkersuisunit oqaatigineqarnera ataatsimiititaliamit isumaqatigineqanngilaq. Taamaalillugu fagini tamani tiimit minnerpaaffissalerneqarnissaani oqaatsinik ilinniartitsinerup qaqugu ingerlanneqarnissaa, katillugu qanoq sivisutigisumik oqaatsinik atuartitsinerup neqeroortigineqarnissaa imaluunniit oqaatsinik atuartitsineq qanoq aaqqissuunneqassanersoq pineqanngimmata ataatsimiititaliamit erseqqissaatigineqassaaq. Tamanna taamaallaat nunatsinni atuartut tamarmik atuarfik pillugu inatsisit tunngavigalugit fagini atuartaaffissaminni minnerpaaffissaliiffigineqarnissaasa isumannaarneqarnissaanik eqqartuineruvoq. Ersaripporli siunnersuummik matuminnga tunngaveqarluni aalajangiinissaq atuarfimmi atuartitsinerup pitsaassusaa oqasllinnermik pillugu taarsissanngitsoq imaluunniit taarsiisariaqartoq.

### ***3.3 Tuluttut aamma danskisut atuartitsinerit amerlaqatigiissinneqarnerat***

Nunatsinni suliffeqarfiutitsinni atuarfiutitsitut ittuni ineriartortitsinermi ilinniarsimasut peqataatinneqarnissaat pingaaruteqartoq ataatsimiititaliamit isumaqarfigineqarpoq. Taamaattulli siunnersuutip uuma immikkoortuata aappaa, tuluttut danskisullu atuartitsinermi

tiimit atorreqartut amerlaqatigiissinnissaannut tunngasoq eqqarsaatigalugu immikkut ilisimasallit Naalackersuisut pilersissimasaasa suliaat isiginiarneqartariaqarpoq<sup>3</sup>. Immikkummi ilisimasallit atuarfimmi oqaatsinik piginnaasaqalertarneq, tassungalu ilanngullugu atuartitsinermi piffissaq suna aallartinneqarnerseq sammisussaavaat. Ataatsimiititaliap paasisinnaavaa siunnersuut akuerineqassagaluarpas, tamanna immikkut ilisimasallit qulaani taaneqartut suliaminnik suli naammassinninnissaminnut periarfissinneqanngitsut, tassani aamma eqimattap ilisimatusarnermini inernerit tunngavigalugit kaammattuutitnik saqqummiussinnginnerani, Inatsisartut suliniutinik aallartitsinissaminnut tunngavissaqalissapput. Taamaattorli atuutilernissaannut ulluliuunneqartoq pissutaalluni tuluttut danskisullu ilinniartitsinermi tiimit atorreqartut amerlaqatigiissinneqarnissaat pillugit aalajangiinissap immikkut ilisimasallit innersuussinerisa inerniliussaasalu piareernissaannut kinguartinneqarsinnaanera tunngavilersorneqarsinnaavoq.

Suliamut matumunnga ataqqinnilluni ataatsimiititaliamit kissaatigineqarpoq imatut allannguutissatut siunnersuuteqarnissaq:

*”Meeqqat atuarfianni fagini tamani akunnernut ilinniartitsiviusussannut minnerpaaffiliinissaq anguniarlugu inatsimmut atuuttumut allannguutissatut siunnersuuteqarnissamut Naalackersuisut peqquneqarnissaannik Inatsisartut aalajangiiffigisassaattut siunnersuut. August 2020-mi allannguutissatut siunnersuut atuutilissaaq. Tamatumunnga atatillugu Naalackersuisut peqquneqarput akullerni atuartut tuluttut danskisullu atuartinneqartarnerisa amerlaqatigiissinnissaannik apeqqu atuarfimmi oqaatsinik piginnaasaqalernissaq pillugu immikkut ilisimasallit pilersinneqarsimasut suliassaannut ilanngunneqassasoq.”*

### **3.4 Atuutsilersinneqarnera**

Siunnersuut maannakkutut iluseqarluni akuerineqassaguni ima isumaqassaaq, suliniutissatut kissaatigineqartoq 2020-mi atuutilissalluni. Piffissaliunneqartoq ataatsimiititaliamit pissusissamisoortutut isigineqarpoq, tassami iliniartitsisut, atuartut angajoqqaallu allannguutaasunut naleqqussarnissamut periarfissaqarniassammata. Atuartuni akullerni tuluttut danskisullu tiimit atuartitsiviusut amerlaqatigiissinneqarnissaat eqqarsaatigalugu tamanna pingaartumik atuuppoq.

## **4. Siunnersuutip aningaasatigut kingunissai**

Inatsisartut suleriaasaanni § 33 imm. 1-imi takuneqarsinnaavoq, aalajangiussassatut siunnersuutip allaffissornermi aningaasatigullu kingunerisassai siunnersuutip tunngavilersuutaani nassuiaatigineqassasut.

<sup>3</sup> <http://naalackersuisut.gl/kl-GL/Naalackersuisut/Pisut/2017/03/090317-EkspertgruppeSprog>

Siunnersuutip piviusunngortinneranut aningaasartuutissatut kinguneritinneqartussat naapertuuttut ataatsimiititaliamit maluginiarneqarpoq. Tassani oqaatigineqarpoq inatsisit atuuttut allanngortinneqarneranik sulineq qaammatit qulingiluat AC-mik atorfeqartitsinermut naapertuuttuusut. Tassa 375.000 kr. Nalingi. Siunnersuuteqartoq assigalugu ataatsimiititaliamit naatsorsuutigineqarpoq – meeqqat atuarfiani nutarternermik suliap aallartinneqareersimasup suliarineqarnerut suliaq manna ilanngunneqarsinnaasoq.

Minnerpaaffissaliinissamut piumasaqaataanera pissutaalluni, ullumikkut atuarfik pillugu inatsimmi allassimasunit atuarfimmi atuartitsiviusuni minnerpaaffissanik amerlanerusunik atuisoqarnissaa naatsorsuutigineqanngilaq. Naatsorsuutigineqarpoq inatsimmi atuuttumi piumasaqaatit atuartitsinermullu pilersaarutit tunngavigalugit tiiminik minnerpaaffissaliinermi pineqartumut ilinniarsimasutut attuumassuteqartut pitsaassuseq nalilersortassagaat. Fagini tamani tiimit minnerpaaffissaminiinnissaat pillugu nalilersuinnerup kingunerissagaluarpagu maannakkut inatsisitigut piumasarineqartut tunngavigalugit minnerpaaffissaminiititsinermi amerlanerusumik atuartitsineq, inatsisitigut piumasarineqartut kiisalu tiimit atuartitsiviusussatut naatsorsuutigineqartut akornanni ataqatigiinngitsoqartoq, nuna tamakkerlugu ilinniartitsisut nukissaqarniarnerisa tulleriinnerisa allanngortinneqarnissaannut tungavilersuut tamanna aamma atuuppoq. Taamaattumillu Naalakkersuisut kommuninik suliamullu attuumassuteqartunut sapinngisamik peqataatitsinissaanik siunnersuuteqartup oqkaammattuuteqarnera ataatsimiititaliamit tapersersorneqarpoq.

##### **5. Ataatsimiititaliap inassuteqaataa**

Ataatsimiititaliap **isumaqatigiittup allannguutissatut siunnersuut** manna saqqummiuppaa:

*”Meeqqat atuarfianni fagini tamani akunnernut ilinniartitsiviusussanut minnerpaaffiliinissaq anguniarlugu inatsimmut atuuttumut allannguutissatut siunnersuuteqarnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. August 2020-mi allannguutissatut siunnersuut atuutilissaaq. Tamatumunnga atatillugu Naalakkersuisut peqquneqarput akullerni atuartut tuluttut danskisullu atuartinneqartarnerisa amerlaqatigiissinnissaannik apeqquut atuarfimmi oqaatsinik piginnaasaqalernissaq pillugu immikkut ilisimasallit pilersinneqarsimasut suliassaannut ilanngunneqassasoq.”*


Ataatsimiititaliap **isumaqatigiittup** matumuuna **allannguutissatut siunnersuut akuerineqartussanngorlugu** inassutigaa.



Taama oqaaseqarluni isumaliutissiisummilu allassimasutut paasinnilluni ataatsimiittitaliap siunnersuut aappassaaniigassanngortippaa.




Mimi Karlsen  
Siulittaasoq



Vivian Motzfeldt  
Siulittaasup tullia



Laura Táunâjik



Peter Olsen



Henrik Fleischer